



Lupo Manarie al à di lâ a Orsarie intune farie a fâ comedâ la sô manarie ma o savê che Orsarie e je un potentât dai Ors e cussì ve che su la puarte dal paîs lui si cjate une sentinele ursine cuntune grande alabarde che i fâs: “Altolà chivalà, giri al largo, fermo o sparo!”

«Cui crodistu di jessi, sentinele, Goldrake? Tu âs une alabarde spaziâl...»

«Ce venstu a fâ tal stât libar di Orsarie?»

«O voi te farie di Berto Fari a fâmi comedâ la manarie...»

«No si puartin armis a Orsarie!»

«Ma la mê no funzione... o ai di fâme comedâ...»

E cussì al passe e al rive te farie di chel sgjavelon di Berto Fari, simpri cu la muse blancje e la bocje rosse pe bocjarie.

Berto al examine la manarie cuntun stetoscopio e al dîs a Lupo Manarie... “Jo no soi la Cure adate... la manarie e à pierdût il fil... tu âs di lâ di dai guos di Resie...”

A chel... la manarie, vint sintût che la prospetive e jere di fâsi uçâ malementri di chei cjochetons, e scjampe vie... tacant a saltâ sul mani e fasint *sproing sproing sproing* come tal fumet di Paperino...

I doi basoâi a cirin di cjapâle ma jê e travierse il paîs di Orsarie e e rive saltuçant sul puint di Levrons, cun desenis di Ors che i corin daûr menaçôs. Al è alarme gjenerâl!

Sì che, Lupo Manarie, che nol permetarès mai che i fasin dal mâl ae sô manarie, che se no ûl fâsi uçâ, e varà lis sôs resons, ce ti fasial? Al mole l'innomenât berli di Lupo Manarie, une ciulade galatiche che e clame dongje ducj i Lôfs di Lovarie, a dâi cuintri ai Ors di Orsarie.

«Cjape chê Manarie!»

«Lasse stâ chê Manarie!»

E intant che a son ancjemò là che a barufin, la manarie e torne cuiete là di Lupo e i doi a van cuiets a Resie, a mangjâ il poleç, che la manarie, ancje se no uçade, e rive istès a taçâ.

**di Checo Tam**

**dissen dai Piçui Aiutants di Contecurte**

**#1021**